

DISPUTATIO MEDICA
INAUGURALIS

DE

VARIOLIS

Quam

Divino fretus auxilio

EX DECRETO ET AUCTORITATE
*Magnifici & Gratosissimi
Collegii Medici*

In Celeberrima & Perantiqua

RAURACORUM ACADEMIA

PRO

SUMMIS IN ARTE MEDICA
HONORIBUS ET PRIVILEGIIS
DOCTORALIBUS

ritè impetrandis

Publico Examini subjicit

THEODORUS BOXBART

Ulmenfis.

Ad diem 4. Iunij. Anni 1675.

Loco Horisq̃ue solitis.



VIRIS
MAGNIFICIS, NOBILISSIMIS,
*maximè Strenuis, Amplissimis,
Prudentissimis*

DN. DN. DUUM-VIRIS
DN. DN. DN. CONSULIBUS

TOTIQUE SENATUI INCLYTÆ
IMPERIALIS URBIS

ULMENSI

PATRIBUS PATRIÆ DN. SUI
omni observantiæ cultu pro-
sequendis

*Hanc suam inauguralem Dissertationem
in sui & suorum studiorum promo-
tionem submisit offert*

THEODORUS BOXBART
Ulm.



DISPUTATIO MEDICA
INAUGURALIS
DE
VARIOLIS.

PROEMIUM.

Sunt cuilibet ætati morbi. Aliis ætatibus missis, qui in puerilem incidunt: Aphthæ sunt, vomitiones, tusses, vigiliæ, pavores, umbilici inflammationes, aurium sordes humide. Hipp. 3. Aphor. 24. Item cum pueri dentire cœperunt, gingivarum molesti pruritus, febres, convulsiones, diarrhææ. 3. Aph. 25: Et cum ætate processerunt, tonsillæ, nec non vertebrae ad occiput intro luxationes, asthmata, vesicæ calculi, lumbrici rotundi, ascarides, verrucæ pensiles, satyriasmus, stranguriæ, strumæ, & alia tubercula. 3. Aph. 26: præcipuè *Ἐξανθήσεις ἐλκώδεις πλείσται*, h. e. plurimæ pustula ulcerosæ, purulentaquæ, quo nomine Variolæ comprehenduntur, & intelliguntur, de quibus quoniam maximi sunt momenti, & per anni spatium longè latèquæ vagantur, Disputatiunculam inauguralem, pro modulo ingenii & viribus, concessa à Magnifico & Gratosissimo Collegio Medico Facultate conscribere & defendere placuit. Jehova juvet conatus.

T H E S I S I.

UT autem certâ methodo & ordine conveniente procedam, quo in pertractandis rebus nihil pulchrius, nihil delectabilius esse dixit Xenophon, divido totam Disputationem in θεωρίαν, & πράξιν: θεωρία continebit Nomen, Definitionem, Differentias, Subjectum, Causas, & Signa: πράξις Indicationes & Auxilia.

II.

Primò de Nomine, ut janua omnis Cognitionis: Variolæ nominis sui originem traxerunt, vel à varis, cum quibus aliquam similitudinem habent, quasi diceret parvi vari; vel à variando, quòd Corporis superficiem variant, & rubram, albam, inæqualem, asperam, & turpem reddant. Appellantur Græcè Ἐξανθήματα, h. e. efflorescentiæ, & Ἐκθύματα, eruptiones per Metaphoram à floribus sumptam, quia spontè erumpunt, & in cute efflorescunt sicut flores in superficie terræ: item Ἐκθύματα ab enascendo, vel pullulando ob eandem rationem. Plinio & aliis Pustulæ Papulæ & Tubercula nuncupantur: Arabibus Bothor: Rhasi Pestis, quòd instar pestis suo tempore lævirent: Interpretibus Avicennæ elevatae Apparitiones, ad discrimen macularum, quibus Cutis infici solet, Germanicè die Blatern/ Kinds-blatern/ die Vocken/ Urschlechten/ Purpulen.

III.

Nomen rectè excipit Definitio, quæ rei Essentiam, & Naturam explicat: Variolas Clariss. D. D. Melchior Sebizius in Disputat. de Variolis & Morbillis tertiâ respondente Joh. Jacobo Wepfero, definit in hunc modum: *VARIOLÆ sunt pustulæ calidæ, humidæ ex ebulliente in vasis sanguine, quinde à facultate expultrice veluti per ἡρίσιν quendam motum ad cutem protrusæ sunt genitæ, ut sanguis malus à bono segregetur.* Clariss. Senertus lib. de Febris cap. 12. hoc modo: *VARIOLÆ sunt pustulæ in summa cute, paribusquè cuti respondentibus, cum febre continuâ erumpentes propter peculiarem sanguinis effervescentiam à facultate expultrice excitatæ.* Utrique harum Definitionum sua debetur laus. Cui neutra placet, tertiam do: *VARIOLÆ sunt pustulæ ulcerosæ, purulentæquè spontè in superficie corporis puerorum cum febre efflorescentes.*

IV.

Generis quidem loco posui pustulas, interim VARIOLÆ sunt complexus omnium morborū. 1. Intemperiei. Febricitant enim pueri ante & post variolarum eruptionem. Prior febris est continua primaria. Posterior symptomatice à suppuratione pendens. 2. Malæ compositionis in Magnitudine, Numero, Conformatione, Situ & Consensu. In Magnitudine, nam tument & tumefaciunt. Numero, quia numerosæ, abundant, quæ naturaliter adesse non deberent. Conformatione, quando quidem Figuram vitiant, obstruunt meatus, & superficiem exasperant. Situ & consensu, quando partes in Variolis situm mutant & coalescunt, ut palpebræ, digitī. 3. Solutionis continui, quatenus ulcerant, perforant, & epidermidem à subjecta cute separant.

V.

Quinimo causæ sunt omnium malorum, actionum læsarum, excrementorum *αμετερίας*, & qualitatum corporis præter naturam mutatarum. Sunt morbus magnus, acutus, aliàs sporadicus, nunc per annum epidemius, malignus, pestilens, contagiosus, fœdissimus, quo ante semper annum hîc Basileæ propè Ciconiam Puella quædam bonæ indolis miserè conflatabatur per integrum mensem: Tanta fuit fœditas, & malignitas, ut cutis universa in squammas fœtidas & crustas ingentes (ex quibus levi tactu sanguis ater effluxit) tenacissimè hærentes solveretur: Corpus omne non aliter contabesceret, & macie nigroreque maximo cum fœtore torreretur, quàm si menses quatuor è furca pependisset, donec tandem duobus diebus ante obitum subito oculis corrosis, & humoribus effusis occœcata esset. Humorem crystallinum elapsum ostendit mihi Præclariss. D. D. ROTH Professor Anat. & Botan. Præceptor ac Hospes meus Honoratissimus.

VI.

Sequuntur Differentiæ. VARIOLÆ non sunt omnes ejusdem conditionis & farinæ. Aliæ sunt veræ: nothæ aliæ. Veræ præviâ perturbatione critica die tertio vel quarto forâs profiliunt: incipiunt à puncto rubro, & sensim elewantur, & augentur, tandem suppurantur, & exiccantur, & crustâ separatâ

sanantur. Nothæ lupini magnitudinem habent, & instar crysalli splendent, unde etiam crysalli nominantur, è quibus aquositas manat, vulgò vocantur *die wilde Kinds-blatern*.

VII.

Ratione qualitatum, coloris quidem rubræ sunt, flavæ, albæ, violaceæ, virides, lividæ, nigræve pro varietate humorum sive sincerorum, sive mistorum & vario uestionis gradu. Hoc anno albæ visæ sunt puncto nigro in medio notatæ, & quæ intermixtas maculas violaceas habuerunt ad salutem terminatæ. Odoris autem, magis vel minùs foetentes.

VIII.

A quantitate, & figura copiosæ sunt, vel paucæ, magnæ, vel parvæ, superficiales & depressæ, quales his temporibus plerumquè fuerunt, vel elevatæ & rotundæ, separatæ vel continuæ.

IX.

Habito respectu ad morem, observamus esse benignas vel malignas, quarum illæ salubres sunt, hæ periculosæ & lethales: mites quoque vel acres & erodentes, quæ dolorificæ sunt, & pruriunt cum rubore splendente.

X.

Porrò si tempus spectamus, quædam citò & subitò apparent: aliæ tardè & segniter erumpunt: aliæ paulatim oriuntur, confertim aliæ: nonnunquam retrocedunt, suborta diarrhoea materia aliò translata: in aliquibus diu durant, & tardè siccantur; in aliis verò ocyùs resolvuntur atquè sanantur pro ratione materiæ, & virium, &c.

XI.

A Differentiis me conféro ad subjectum, h. e. ad sedem affectam, quæ est cutis corporis (*αἰσθητικόν* temperamentorum, & sensorium tactus) quam natura porosam efformavit propter excrementorum & superfluitatum expulsionem & corporis repurgationem. Occupant extrema maximè, faciem scilicet & artus naturæ robore expulsæ: *quamvis quidam referente Clariss. Fernel. lib. 2. cap. 12. de abditis rerum causis dissecti sint, quibus jecur, lien, pulmones, omniaquè interiora non secus atquè cutis sordidissimis papulis manantibus scaterent.*

XII. Par-

XII.

Parti affectæ commodè subjunguntur Causæ: Causæ sunt externæ vel internæ. Externæ VARIOLARUM in genere sunt omnes illæ, quæ sanguinem crudum & vitiosum gignunt, quæ putredini occasionem præbent, & ebullitionem five fermentationem conciliant: In specie tres sunt præprimis notabiles. 1. Aër calidus, humidus, qualis est vernalis potius quàm autumnalis, austrinus, pluviosus vel quacunque ex causa venenatus, & malignus, vel inæqualis, qui subitas patitur mutationes. Quare Magnus Hipp. sapienter scripsit. 3. Aph. 1. Mutationes defectionesquæ temporum, & insignes mutationes frigoris aut æstus, quæ in singula incidunt anni tempora maxime parere morbos, & 3. Aph. 16. Ab assiduis imbribus fieri putredines. 2. Victus pravus, hinc cruditates, & putredines iterum nascuntur, ex quibus febres & variolæ in pueris nondum defœcatis resultant. 3. Contagium, quod contemnendum non est. Exit enim ex infecto corpore præsertim graviter olente, cujusmodi sunt corpora puerorum variolis afflictorum, inquinamentum & seminarium quoddam, quod cum aëre haustum à corpore analogo similem humorum agitationem, & ebullitionem efficit.

XIII.

Internæ plures sunt: Impuritates in utero collectæ, & extrâ uterum propter ingluviem puerorum, & voracitatem auctæ, quæ tamdiu sopitæ delitescunt, donec à causâ aliquâ privata vel communi, ut anomalia temporum & tempestatum, commotæ in putredinem agantur: Harum impuritatum, sordiumquæ putredo, & effervescentia: Atquæ etiam propria puerorum dispositio calida, humida jam per se ad putredinem proclivis. Hæ causæ sunt, & non aliæ propter quas Homo variolis obnoxius: obnoxius cum puer est. Quod autem populariter errent adscribendum internæ puerorum impuritati, & externæ anomalie simul. Sed ut causas absolvam, interna proxima & immediata, sunt eadem fordes conceptâ putredine & fermentatione à naturâ ad ambitum corporis protrusæ.

XIV.

Possum commodè has fordes ichores sanguinis appellare,

qui prout est pituitosus, biliosus, melancholicus, &c. ita variolas purpureas, albas, violaceas, nigras, &c. efficit. Quò autem isti ichores sunt blandiores vel acriores, eò quoquè mitiores vel mordaciores, & magis corroddentes proferunt variolas.

XV.

Restant signa, quæ nos ducunt in abditarum rerum cognitionem, sine quâ Medicus Andabatarum more pugnat. Signa sunt duplicia Diagnostica, & Prognostica: Diagnostica triplicia sunt: Morbi, causæ & partis affectæ. Signis opus non est ad cognitionem partis affectæ, ut quæ est cutis corporis externa, nisi cum etiam interiora afficiuntur, tum quælibet pars interna sui affectus prodet signa, ut pulmo difficilem respirationem, & dolorificam, angustiam pectoris, tussim, raucedinem, & febrem graviolem: Signa causarum quod attinet, utrum sint ex sanguine, bile, pituita, &c. ex humoribus sinceris, vel mistis magis minusvè adustis, putridis, corrosivis: ex colore, calore, dolore, aliisque circumstantiis, prudens quilibet facile distinguet.

XVI.

Signa morbi sunt signa Febris, & Variolarum: signa Febris alia non sunt quàm quæ continuam indicant. Signa Variolarum imminentium (Nam præsentés oculis patent, & à Mulierculis promptè distinguuntur) æquivoca sunt, & communia cum Morbillis, suntquè sequentia recensente Clariss. Sennerto citato loco: *Ubi autem imminet Variola & Morbilli, adsunt dolor capitis, oculorum, gutturis, narium pruritus, sternutatio, terror in somno, paroxysmi epileptici similes, dolor dorsi, ardor & punctationis sensus in Cute, difficultas spirandi, tussis sicca, tremor pedum, oscitatio, pandiculatio, cordis palpitatio. Quæ læsæ actiones accidunt ex sanguinis ebullitione ac fuliginibus inde per totum corpus dispersis. Urina sanorum urina sæpè non est dissimilis, materia vitiosa ad ambitum corporis protrusa: interdum etiam turbida ob magnam humorum ebullitionem. Hemorrhagia narium est frequens, lachrymæ spontè ex oculis solent erumpere, aut oculi lachrymabundi apparent: Vomitus quoquè interdum accidere solet. Facies ac oculi rubent; Cutis est aspera, Vox rauca. Tandemquè etiam Febris ex humorum ebullitione accenditur. Hæc ergo signa pleraquè si adsunt, & circa tertium vel quartum diem*
augen-

argentur, ac maculae quaedam rubentes in cute apparent imminentium Variolarum vel Morbillorum indicium est. Augeturque hæc suspicio, si Variolæ vel Morbilli publicè grassantur. Ergo si Variolæ non Morbilli publicè grassantur, si puer Variolis nondum laboravit, hæc signa Variolas puero imminere & nocere indicant, maxime cum paulò post maculae illæ in altum attolluntur, & postea in pustulas albas pure repletas mutantur.

XVII.

Differentiæ Variolarum sensibus obviæ sunt. Itaque signis iterum non est opus. Quod autem sint epidemiæ, & pestilentes cognoscitur ex prægressâ inæqualitate temporis & tempestatis, ex multitudine Ægrorum, vehementia symptomatum & multorum interitu.

XVIII.

Satis de Diagnosticiis. Prognostica sunt de Tempore, & de Eventu. Tempus quod concernit terminantur Variolæ diebus 14. Oriuntur tertio vel quarto. Augmentum ad septimum protrahitur. Status undecimo viget. Inde ad 14. est Declinatio, quamvis exiccatio ad 20. nonnunquam extendatur, Senn. citato loco.

XIX.

Eventus ita habet: salus speratur si citò erumpunt, citòque maturantur; si multæ, magnæ, eminentes, rotundæ, albæ, molles, & separatæ sunt; si post ortum febris cum symptomatibus remisit, & anhelitus facilitas adest; si largior hæmorrhagia præcessit. E contra periculosa, vel planè exitiales futuræ sunt, quæ non erumpunt, quæ subsidentes retrocedunt, quæ violaceæ, virides, lividæ, nigrae apparent, præsertim cum febris non cessat, symptomata non mitescunt, & interea vires labascunt. Lethale signum est crusta nigra circa os in augmento: lethalis est alvi fluxus.

XX.

Finita qualitercunque Theoria, venio ad Praxim sive Curam, quam paucis absolvam, consistit tota in Indicationibus, & Auxiliis. Indicationes sunt totius Curationis Anima. In fædo hoc malo plures sunt, à Causâ, morbo, symptomatibus, & viribus sumendæ. Ratione Causæ quid agendum? Viti-

osi humores evacuandi sunt, corrigendi, expellendi à centro ad corporis peripheriam, sicquè naturæ conatus est adjuvandus: Ratione Morbi Variolarum nempe maturandum, siccandum, mundificandum, lævigandum; feбри tamen non neglectâ, quæ refrigerationem, & humectationem requirit: Ratione symptomatum agendum, & medendum pro re nata: Ratione virium conservandum corroborandumquè.

XXI.

His Indicationibus annecto aliam magni momenti: Totum negotium naturæ committendum, & nihil agendum esse, nisi quod postea in Diæta præcipietur. Variolæ enim motu critico extruduntur, quem cum natura benevalens rectè peragit, sinenda est, & non interturbanda & impedienda, quod seriò nobis inculcavit Hipp. 1. Aph. 20. *quæ judicantur perfectè, quæquè judicata sunt exquisitè, nullo modo movenda, nequè novanda; nequè medicamentis purgantibus, nequè aliis irritamentis, sed missa facienda.*

XXII.

Indicationibus elicitis & determinatis, proximum nunc est, ut accedam ad auxilia, quibus iis satisfacere possumus. Depromuntur ex Penu triplici Diæta, Chirurgia & Pharmacia. Diætam quod concernit, Æger habendus est in aëre tepido & obscuro, frigus ambientis omni studio arcendum. Alioqui Variolæ aut non erumpent, aut ortæ retrocedent. Deinde ab initio tenuiter nutriendus cibus boni succi, facilis coctionis moderatè refrigerantibus, ut ovis recentibus forbilibus, jusculis, cremore hordei, pomis coctis, &c. Postea Variolis arescentibus plenius ad corporis & virium instaurationem. Toto tempore à vino abstinendum, & in locum Decoctum C. C. rasp, vel hordei, vel rad. tormentill. & acetos. propinandum. Videndum probè ne nimis vel avidè, vel frigidè bibat. Quæritur utrum lentes possint convenire? Affir. sed admistis idoneis, quæ vim tenuantem habent. Cæteræ res non naturales ita regendæ sunt, ut excrementa non diutius subsistant, ut plus dormiat parvus, quàm vigilet, ut animo & corpore quiescat in lectulo suo superimposito panno rubro ad motum humorum ad exteriora promovendum.

XXIII.

Ex Chirurgia tria suadentur. Venæsectio, Cucurbitulæ, & Perforatio. Quantum ad primum præsidium respondeo ex Mercurial. de morbis puërorum cap. 2: *Dicunt omnes convenire sanguinis missionem in hac curatione, & certè si respicimus ebullitionem, si plenitudinem corporis, quæ plerumquè solet hos morbos comitari procul dubio indicationem habebimus mittendi sanguinis, quare nisi aliquid obstitit vel Ætas, vel aliud quid, ego quoquè suadeo, ut is omnino mittatur.* Hucusquè Mercurialis. Sed mox in principio ante eruptionem, ut natura oneris parte levatâ reliqua facilius expellat. Cucurbitulas lumbis, natibus, poplitibus applicandas ad materiam proliciendam in superficiem, etiam non contemno. Sed Perforationem, quæ acu aureâ perfici debet, quo tempore Variolæ dealbatae sunt, præterquam quòd molesta sit, supervacaneam habeo. Malim majores forfice aperiri, & linteo mundari.

XXIV.

Pharmacîa multâ suggerit auxilia ad evacuationem, correctionem, expulsionem, mitigationem symptomatum, & defensionem corroboracionemquè virium aptâ. 1. Clysteres ex lacte, vitello ovi, & sacch. & Purgantia quæ impedimenta ex primâ regione removeant, quæ naturam in propellendo turbare possunt, vel reliquias tollant. Illa ab initio, hæc in statu convalescentiæ locum habent. Sint autem lenia, quæ simul fervorem restinguant, & partes internas robovent ex syr. ros. s.s. vel comp. syr de Cich. cum Rhab. & similibus: 2. Sudorifera extemperatiore, vel frigidior materia, quæ ad anteriora pellunt, & eâdem operâ febris & malignitati resistunt e.g. R. Aq. acetos. scabios. fumariæ. syr. citri an. ʒjß. C.C. in alembico præparati ʒj. detur duabus, aut tribus vicibus horâ somni & manè, vel R. Pulv. rubei pannonic. ʒj vel Lap. Bezoar: or. gr. v. vel vj. plus minus pro ratione ætatis: dentur aut cum simili julepo, aut in jusculo, aut decocto C.C. vel utere sem. napi, carduib. aquileg. citri in Emulsionibus, vel pulvere ex Coralliis rubris & Margaritis præparatis æqualiter mistis. 3. Becchica ad expectorationem, & faciliorem respirationem v.gr. R. syr. pap. rhead. violar. jujub. aq. scabios. an. ʒß. 4. quæ anginae

occurrunt

occurrunt, ut aq. vel decoctum plantag. rosar. balauft. prunell.
cum fyr. granat. acid. 5. quæ alvi fluxum prohibent, ut aq.
plantag. cum fyr. cydonior. & bolo armena, terra sigillata &c.
& decoctum rad. tormentill. quod valde probo: aliisque
symptomatibus oculorum, aurium, narium, &c. consulunt, cu-
jusmodi sunt oculorum discutientia, ut aq. florum sambuci, for-
ma fots, anodyna ut lac muliebre: detergentia ut Tuti præ-
parata. De repellentibus nihil audiam. Narium ad meliorem
respirationem & refrigerationem partium nobilium suppo-
sitoria ex butyro recenti indenda &c. 6. Cordialia ut aq. cardiac.
offic. mistam cum aq. acetos. & scabios. ad conservationem
virium.

XXV.

Maturatio, exiccatio, lævigatio Opera sunt Naturæ magis
quàm Artis: licebit tamen majores in facie, ut citius matu-
rentur, exiccentur, crustæquæ separentur, & minùs exedant,
ol. blandis, amygd. d. oliv. nucum, pinguedine humana, &c.
illinire, & ad lævigandum h. e. ad cicatrices, & maculas de-
lendas & foveas explendas, cosmetica usurpare, quæ in ma-
teriâ medicâ, & apud practicos prostant, illa maximè quæ
simul colorem reddunt, qualis est hic cremor Mercurialis
citato loco: ℞. Lupinor. fabar. hordei an. p℥ contundantur
crasso modo, & in qs. aq. f. bulliant usquequò perveniat aq.
ad crassitiem veluti pultis, ad ablutionem faciei & ma-
num: Et hoc linimentum ejusdem, quod recipit Ol. oliv.
dulcis. succum limonum, lytharg. lotum, cineres testu-
dinum combustarum, pulv. rad. cannæ, & pingued.
gallinæ, vesperi inungendum, & mané
decocto lupinorum abluen-
dum.

Deo sit Laus, Honor & Gloria
in sempiterna secula,
Amen.

F I N I S.